

## Nureksain Lengkaru Efektif ring Teks Orti Acara Terpong Buleleng ring Radio Citra Bali FM

Luh Restia Dewi<sup>1</sup>, Ida Bagus Putra Manik Aryana<sup>1</sup>, I Ketut Paramarta<sup>2</sup>

Program Studi Pendidikan Bahasa Bali  
Universitas Pendidikan Ganesha  
Singaraja, Indonesia

e-mail: [dewirestia18@gmail.com](mailto:dewirestia18@gmail.com)<sup>1</sup>, [yc9cda@yahoo.com](mailto:yc9cda@yahoo.com)<sup>1</sup>,  
[ketutparamartha@undiksha.ac.id](mailto:ketutparamartha@undiksha.ac.id)<sup>2</sup>

### Kuub

Tetilikan puniki matetujon (1) Nelatarang kawentenan lengkaru efektif manut cecirenyane ring sesuratan teks orti sane wenten Radio Citra Bali FM (2) Nelatarang pikobet-pikobet penyiar sajeroing nyusun lengkaru efektif sane wenten ring acara Terpong Buleleng. Jejering tetilikan inggih punika sesuratan orti ring Radio Citra Bali FM. Panandang tetilikan inggih punika penganggen lengkaru *efektif* sane wenten ring sasuratan orti ring Radio Citra Bali FM ring acara Terpong Buleleng. Kramaning tetilikan sane kaanggen minakadi *piranti dokumentasi*, lan sadu wicara. *Data* tureksa sane kaanggen madasar antuk Deskriptif Kualitatif, inggih punika *Identitas data, Klasifikasi data, Reduksi data, Deskripsi Data, Analisis Data, lan panyutet*. Pikolih tetilikan minakadi, (1) Manut cecirenyane wenten 1225 lengkaru sane wenten ring teks orti Radio Citra Bali FM sane efektif, lan wenten 146 lengkaru kabaosang nenten efektif. Lengkaru sane nenten efektif kaawinang olih ceciren kasatuan, kehematan, penekanan. (2) pikobet saking penyiar ngaryanang teks orti Ring Radio Citra Bali FM inggih punika meweh nerjemahang teks orti ngawit basa Indonesia ke basa bali lan galah sane kasayagang rikala nerjemahang akidik nanging teks sane katerjemahang dawé sane ngawinang lengkaru nenten efektif.

**Kruna jejaton** : lengkaru efektif, radio

### Abstrak

Penelitian ini bertujuan (1) menjelaskan keberadaan kalimat efektif di Radio Citra Bali FM menurut cirri-cirinya (2) menjelaskan permasalahan yang dialami penyiar ketika menyusun kalimat efektif di acara Terpong Buleleng. Subyek dari penelitian ini adalah penulisan teks berita di Radio Citra Bali FM. Obyek penelitian ini tentang penggunaan kalimat efektif dalam berita yang ada di Radio Citra Bali FM diacara Terpong Buleleng. Metode penelitian yang digunakan yaitu dokumentasi dan wawancara. Analisis data yang digunakan Deskriptif Kualitatif, seperti Identitas data, Klasifikasi data, Reduksi data, Deskripsi Data, Analisis Data, dan kesimpulan. Hasil dari penelitian yaitu (1) Berdasarkan cirri-cirinya sebanyak 1225 kalimat dalam berita Radio Citra Bali FM di kategorikan sebagai kalimat efektif, sedangkan sebanyak 146 kalimat di kategorikan sebagai kalimat yang tidak efektif. Kalimat yang tidak efektif disebabkan oleh cirri kesatuan, kehematan, penekanan (2) permasalahan yang dialami penyiar ketika menterjemahkan berita di Radio Citra Bali FM adalah kesulitan dalam menterjemahkan berita dari bahasa indonesia ke bahasa bali dan waktu yang disediakan sangat sedikit tetapi teks yang diterjemahkan panjang yang menyebabkan kalimat tidak efektif

**Kata kunci:** kalimat efektif, radio

### Abstract

This study aims (1) to explain the existence of effective sentences on Radio Citra Bali FM according to its characteristics (2) to explain the problems experienced by broadcasters when composing effective sentences at the Terpong Buleleng event. The subject of this study is writing news texts on Radio Citra Bali FM. The object of this study is the use of effective sentences in the news on Radio Citra Bali FM in the event of Buleleng Binocular. The research method used is documentation and interviews. Analysis of the data used is qualitative qualitative, such as data identification, data classification, data reduction, data description, data analysis, and conclusions. The results of the study are (1) Based on the characteristics as much as 1225 sentences in the Radio Citra Bali FM news are categorized as effective sentences, while 146 sentences are categorized as ineffective sentences. Ineffective sentences are caused by the characteristics of unity, frugality, emphasis (2) the problems experienced by the announcer when translating the news on Radio Citra Bali FM is the difficulty in translating news from Indonesian into Balinese and the time provided is very little but the text is long translated causes the sentence to be ineffective

Keyword : effective sentence , radio

### PURWAKA

Basa inggih punika sarana utawi piranti sane kaanggen mabebaosan ring sajeroning kauripan para janane. Kawetenan basa punika sampun kaplajahan mawit saking wawu embas nyantos mangkin. Ring kawagedan mebasa para janane ngawitin saking malajah mirengang basa, sausan punika malajah mabebaosan ring keluarga, sawitra muah kramane. Sausan malajahin mabebaosan wau prasida malajah ngwacen lan nyurat.

Ring aab sekadi mangkin sampun kauningin akeh pisan piranti sane kaanggen mabebaosan (*berkomunikasi*) silih sinunggilyane ring kawetenan media masa sane makeh pisan kawigunannyane minakadi ngaturang gatra-gatra utawi informasi majeng ring krama bali. Media massa inggih punika piranti sane kaanggen ring sajeroning nguningayang pabesen majeng ring sang sane mirengang (*penerima*) sane nganggen piranti-piranti mabebaosan sakadi surat kabar, film, radio, lan televisi (Cangara, 1998 :140).

Media masa madue akeh kaluwihan, krana sampun akeh wenten ring kauripan para janane lan madue kawigunan sane pinih utama pisan. Punika ngawinang media massa pinaka silih sinunggil piranti sane mabuat pisan ring sajeroning kawetenan lan panglimbak basa. Malarapan antuk media masa, kawetenan ring sajebag jagate mangkin prasida kauningin. Media masa pinaka saluran orti-orti majeng ring krama. Media masa sane wenten inggih punika marupa piranti cetak lan elektronik. Piranti cetak sane wenten boya ja wantah asiki, nanging sampun akeh para jana sane ngamedalang gatra-gatra malarapan antuk piranti cetak puniki. Piranti cetak sane wenten ring Bali luih ipun *Bali Post*, *Denpost*, *Tribun Bali*, miwah sane tiosan. Makasami piranti cetak sane wenten ring Bali sampun ngunggahang gatra-gatra indik kawetenan jagate sane mangkin, lianan ring piranti cetak wenten piranti elektronik.

Piranti elektronik punika pinaka piranti sane marupa rekaman video, rekaman audio, lan piranti sane nelatarang *multimedia*. Piranti

elektronik sane sampun ketah kauningin ring jagate sakadi Televisi, internet, computer, radio miwah sane lianan. Piranti radio silih sinunggil piranti sane kasub ring jagate, utamane ring jagat Buleleng. Kawentenan radio utamannyane ring wewidangan Kabupaten Buleleng minakadi radio RRI, Singaraja FM, Guntur FM, Pesona Bali FM, Hexon FM, Citra Bali FM, Nuansa Giri FM, Semeton Takdir FM lan Suara Tehnika FM.

Ring radio Citra Bali FM wenten acara-acara sane nganggen basa bali. Ring radio puniki prasida kapiirengang indik acara-acara sane mabasa bali sekadi erti bali, tembang bali, taler hiburan sakadi gegonjakan lan acara magendu wirasa. Majalaran antuk punika kawentenan media massa dahat mautama pisan ring sajeroning panglimbak basa. Malarapan antuk media radio, kramane pacang molihang gatra-gatra sane wenten ring jagate. Silih tunggil usaha media radio nglestariang basa Bali inggih punika malarapan antuk nyiarang parikrama sane nganggen basa Bali. Ring radio Citra Bali FM antuk program teropong Buleleng sadina-dina nyiarang patpat ngantos lima erti. Saking erti-erti sane kesiarang punika madaging pengeling-eling indik kawentenan jagat Bali utamane ring buleleng. Orti pinaka karya tulis sepatutnyane kasurat nganutin tata titi sesuratan sane patut, seusan punika wau kasobyahang ring media massa sekadi radio. Pinaka penyiar orti ring radio madue amongan nyiarang orti majeng kramane malarapan antuk ngwacen sesuratan (*teks*) ortinyane. Sajeroning mabebaosan pinaka penyiar radio sampun pastika madue widya utawi tata cara ring sajeroning nyiarang radio. Ring sajeroning mabebaosan dados penyiar radio parindikan sane patut kauratiang inggih punika

pengangge basanyane. Kawagedan mabababosan dahat mautama pisan lianan sareng punika penyiar punika patut nyiagayang dewek mangda manut lan patut nguratiang bebaosan, intonasi taler lengkara sane kabaosang mangda becik kapiireng.

Manut Hudoro (2004 : 59) nelatarang ritakala mabebaosan dados penyiar radio patut nguratiang bebaosan sane becik. Penyiar punika patut nyiagayang raga mangda manut lan patut nguratiang bebaosan, intonasi taler sane kabaosang mangda becik kapiirengang. Suara punika pinaka modal sane pinih mautama rikala dados penyiar. Dadosnyane yening sampun suara lan *teknik vocal* sampun becik, sampun pastika sang sane mirengang acara ring radio punika rumasa seneng miarsayang. Cutetnyane mabebaosan dados penyiar patut nguratiang kontinuitas sane becik. Punika taler penyiar radio sane nyiarang acara-acara sane nganggen basa bali patut urati ring soang-soang lengkara sane pacang kesiarang. Santukan kantun akeh penyiar rikala nyiarang orti iwang tata titi lengkaranyane.

Kawentenan basa bali ring Radio Citra Bali FM sampun mangumbara mawit saking warsa 2012. Ring radio puniki makeh pisan acara sane prasida kapiireng nyabran rahina, nanging nenten makasami sane nyiarang basa bali. Acara sane nyiarang indik basa bali minakadi acara Citra Dewata sane galah siarannyane ngawit saking jam 09.00 wita ngantos 12.00 wita, antuk wastan penyiarnya Gek Ma. Acara puniki kalaksanayang telung galah, tur sane kasiarang punika tembang-tembang pop bali. Ngelantur ring jam 15.00 wita ngantos 17.00 wita punika wenten acara Gita Persada Bali. Acara puniki nyiarang indik tembang bali alternative utawi tembang band bali

sane wasta peniarnyane Gek Ma, Kelanturang antuk jam 17.00 wita ngantos jam 19.00 wita kalaksanayang acara Warna-Warni Dewata, ring acara puniki pateh sekadi ring acara citra dewata nanging ring acara puniki wenten nyiarang orti ngeninin indik budaya lan jam 19.00 wita ngantos 20.00 wita punika kalaksanayang acara Teropong Buleleng, sane nyiarang mawasta Kukuh Setiawan, ring acara puniki penyiar nyiarang indik gatra-gatra utawi berita sane wenten ring jagat Buleleng. Gatra sane kasiarang wenten sane marupa gatra politik, ekonomi miwah sane lianan.

Gatra pinaka pahan sane nenten sida kalempasang saking kauripan manusa (Juanedi, 2013:1). Gatra sane kasiarang olih media masa makasami taler kakepah dados makudang-kudang pahan inggih punika wenten gatra indik politik, sosial, ekonomi, budaya, hukum, olahraga, miwah sane tiosan. Pidabdab utama sane patut kauratiang rikala pacang nyurat orti ring radio inggih punika basa lisan miwah basa sasuratan. Ketah nyane, sakancan sane kasiarang ring radio punika kasiagayang dumun, kasurat ngelantur tureksain, selantur ipun kawacen.,,,,,, Miwah basa sane kaanggen mangdane becik, patut, lan *efektif*. Kurniawan (2012 : 59) maosang lengkara *efektif* inggih punika lengkara sane nguningayang pikenoh pangawi, dados nyane sang sane ngwacen ngresep antuk napi sane kabaosang. Ceciren *lengkara efektif* manut Putrayasa (2010) wenten petang soroh inggih punika (a) pasikian(kesatuan) (b) irit(kehematan) (c) penegasan lan (d) variasi.

Pinaka silih tunggil *media masa* sane wenten ring singlaraja, Radio citra bali FM sampun

sepatutnyane midabdabin *lengkara efektif* ring sajeroning sasuratan orti-orti sane kasiarang.

Ring Radio citra bali FM madue acara sane mabasa bali inggih punika acara Teropong Buleleng sane kasiarang khusus olih penyiar Kukuh Setiawan. Penyiar puniki katilikin santukan penyiar sampun waged pisan mabebaosan nganggen bahasa bali napi malih ipun mahasiswa Pendidikan Bahasa Bali ring Undiksha. Lianan ring punika penyiar puniki khusus nyiarang indik acara Teropong Buleleng ring radio sane nyobyahang indik gatra-gatra mabasa Bali sane wenten ring jagat Buleleng.

Malarapan antuk panureksan sane kalaksanayang sadurungnyane, eling tekening media sane pinaka sinilih tunggil piranti paplajahan luih ipun basa Bali, panilik ngemargiang tetilikan puniki ring siaran radio citra Bali FM, santukan radio Citra Bali FM kasub ring jagat Buleleng, semaliha penyiar – peniarnyane sampun kaloktah andel, punika mawinan panilik meled nilikin lengkara – lengkara *Efektif* ring radio Citra Bali FM. Rauh mangkin durung wenten para jana sane nilikin indik penganggen lengkara *efektif* ring sesuratan orti utamanyane orti ring Radio Citra Bali FM. Santukan lengkara *efektif* mabuat pisan kaanggen ring sesuratan orti sane pacang kaunggang ring ambara, punika mawinan tetilikan puniki mangdane penganggen lengkara *efektif* sane wenten ring acara Teropong Buleleng ring Radio Citra Bali FM prasida kaanggen pustaka mangda sida nyobyahang gatra sane pinih becik. Nganutin babaosan puniki, panilik meled uning sapunapi penganggen lengkara *efektif* miwah napi sane pinaka pikobet rikala nyurat lengkara *efektif* ring sajeroning sesuratan orti ring Radio

Citra Bali FM ring acara Teropong Buleleng.

Pikobet punika kawatesin malih mangda panilik prasida paripurna sajeroning nepasin pikobet tetilikan. Pikobet sane jagi kabahbahang wenten ring sajeroning bantang pikobet. Mawit saking dadalan pikobet ring ajeng wenten pikobet sane dados tetuek inggih punika sakadi ring sor : (1) Nelatarang kawentenan lengkara efektif ring sesuratan teks orti sane wenten Radio Citra Bali FM (2) Nelatarang pikobet-pikobet penyiar sajeroing nyusun lengkara efektif sane wenten ring acara Teropong Buleleng

### KRAMANING TETILIK

Kramaning tetilik inggih punika kahanan indik pamargi ring sajeroning tetilikan. Pamargi tetilikan nyangka ring undagan-undagan dasar sane katempuh olih panilik anggen nyaurin pikobet-pikobet sane katlatarang (Wendra, 2012:31).

Data sane kapalihang kaparakang utawi kagambarang manut pikolih seseleh miwah saduwicara ring genah tetilikan. Mapaiketan sareng tetilikan puniki, kapalihang kramaning tetilikan manut pikobet miwah tetujon tetilikan sane mawiguna anggen nuntun panilik rikala nglaksanayang tetilikan. Pamargi sane pacang kabaosang ring kramaning tetilikan luar ipun : (1) palihan tetilik, (2) subjek lan objek tetilik, (3) mupulang data, (4) piranti tetilik miwah (5) data tureksa. Palihan tetilikan prasida karesepang sakadi naya (*strategi*) mangda penilik molihang data sane patut (*valid*) manut sakadi *karakteristik variabel* miwah tetujon tetilikan. Tetilikan puniki kalaksanayang nganggen palihan tetilikan deskriptif kualitatif. Sukardi (2003:157) maosang indik tetilikan *deskriptif* ketahnyane kalaksanayang

manut tetujonnyane inggih punika ngambarang manut pidabdab kasujatian (*fakta*) lan cihna subjek utawi objek sane katilik nganutin pidabdab sane patut. Pendekatan kualitatif ketahnyane ngutamayang ring pamargi tetimbang pikenoh panguntatnyane. Punika mawinan eed-eean parilaksana sida maobah manut kahanan miwah akehnyane cihna sane kapanggih. Tetujon tetilikan ketahnyane mapaiketan ring kawentenan puniki, tetilikan katuju ring parikrama panganggen lengkara *efektif* ring sesuratan orti sane wenten ring Radio Citra Bali FM acara Teropong Buleleng.

Subjek tetilikan inggih punika sakancan sane madue genah pinih utama. Punika mawinan, ring subjek genah variabel sane katilik. Manut babaosan punika, subjek ring tetilikan puniki, inggih punika sesuratan orti ring Radio Citra Bali FM ring acara Teropong Buleleng. Sesuratan orti sane kajudi pinaka subjek tetilikan santukan ring Radio Citra Bali FM pinaka piranti penyiaran sane sampun nglimbak. Siarannyane sampun wenten ring sajebag wawidangan Bali khususnyane ring kabupaten Buleleng. Mawinan nganggen acara Teropong Buleleng santukan mapaiketan sareng objek tetilikan inggih punika lengkara *efektif* ring sasuratan orti ring Radio Citra Bali FM ring acara Teropong Buleleng punika pastika akeh madaging krana-krana saking basa Indonesia sane nenten patut basa Ballyane.

Objek tetilikan inggih punika parindikan sane pinaka pikobet ring tetilikan (Wendra, 2012 : 32). Nganutin babaosane punika objek ring tetilikan puniki inggih punika panganggen lengkara *efektif* sane wenten ring sasuratan orti ring Radio Citra Bali FM ring acara Teropong Buleleng. Lengkara *efektif* sane kajudi, santukan ketahnyane lengkara sane kaanggen ring orti

punika nenten nganutin kepatutan (*efektifitas*) sane patut. Basa sane kaanggen ring sasuratan punika mewah karesepang. Malarapan antuk tetilikan puniki kaaptiang mangdane orti sane kasiarang nganggen tata titi lengkara *efektif* sane patut tur lengut kapireng.

Kramane mupulang data sane kaanggen nguningin data indik lengkara *efektif* sane wenten ring Siaran Radio Citra Bali FM ring acara Teropong Buleleng inggih punika metode dokumentasi miwah saduwicara.

Kramaning saduwicara inggih punika ngambil data sane marupa dokumen. Dokumen punika marupa sesuratan ring orti teropong buleleng ring Radio Citra Bali FM. Dokumen inggih punika pangeling-eling indik kahanan sampun mamargi (Sugiyono, 2010:329).

Kramaning saduwicara inggih punika kramaning molihan data nganggen naya upaya panilik miwah narawakia mablighbagan. Saduwicara puniki anggen nlatarang kapiambeng sane kapolihang rikala nyurat sesuratan orti ring Radio Citra Bali FM ring acara Teropong Buleleng. Saduwicara pinaka silih tunggil tata cara mupulang orti, data, miwah kesujatian(fakta). Saduwicara sane kalaksanayang inggih punika saduwicara sane nganutin wangun.

Piranti tetilikan durung janten kalimbakang sadurung pikobet sane katilik kasinahang. Punika mawinan, panilik inggih punika piranti mautama ring tetilikan. Ring tetilikan puniki kaanggen piranti mupulang data sane marupa dokumentasi miwah saduwicara.

Sugiyono (2006:336) maosang : *Menganalisis data merupakan proses mencari dan menyusun yang di peroleh dari hasil observasi, saduwicara, catatan lapangan, dan dokumentasi, dengan cara mengorganisasikan data ke dalam kategori, menjabarkan kedalam unit-*

*unit, melakukan sintesis, menyusun ke dalam pola, memilih data yang penting dan membuat simpulan."*

Data tureksa sane kaanggen ring tetilikan puniki madasar antuk tata cara *deskriptif kualitatif*. Wenten makudang-kudang parikrama ring data tureksa sane pacang kalaksanayang ring tetilikan inggih punika *Identitas data* (Mastikayang Ceciren Data), *Klasifikasi data* (Nyorohang Data Manut Tetujon lpun), *Reduksi data* (Ngicalang Data Sane Nenten kasaratang), *Deskripsi Data* (Nelatarang Indik Data), *Analisis Data* (Data Tureksa), *Kesimpulan* (Tetingkesan),

## PIKOLIH LAN TETEPASAN

Tureksa prasida kalaksanayang sawusan Orti ring Radio Citra Bali FM kapupulang. Nureksain lengkara *efektif* Teks Orti Acara Teropong Buleleng ring Radio Citra Bali puniki kalaksanayang 4 wuku, inggih punika ngawit tanggal 14 Mei 2018 ngantos tanggal 15 juni 2018. Ring sor puniki keparakang pikolih tetilikan inggih punika a) kawentenan lengkara efektif ring RadioCitra Bali FM manut cecirenniyane b) pikobet sane kapanggih olih penyiar teks orti acara Teropong Buleleng sajeroning nyusun lengkara efektif. Rikala nureksain data sampun puput kalaksanayang wau panilik ngamargiang kramaning saduwicra.

### 1. Lengkara Efektif ring Sesuratan Teks Orti ring Radio Cita Bali FM Manut Cecirenniyane.

Manut seseleh ring widangan lengkara efektif, tatepasan pikolih *dokumentasi* kakepah dados telulas (13) pahan kaiwangan. Manut panureksan sane sampun kalaksanaang kapanggih lengkara efektif ring teks orti Radio Citra Bali akehan iwang

ring widangan 1) Jejering miwah linging 10 lengkara, 2) nyihnaang indik pasikian “tetujon” miwah “panados” 2 lengkara, 3) Ngewawanin Jejering Lengkara 45 lengkara, 4) Penganggen kruna Pangarep “saking” miwah “saihang”(penggabungan kata depan “dari” dan “daripada”) 1 lengkara (5) Ngeserang Genah Frase 9 lengkara, (6) Ngewawanin Kruna sane Pateh 79 lengkara.

Ring wewidangan pasikian (*kesatuan*) wenten 4 pahan sane katureksain. Pahannyane inggih punika (a) Jejering miwah linging (*subjek dan predikat*), (b) Dasar Pikayunan (*gagasan pokok*), (c) Nyihnaang pasikian “awinan’ miwah “galah” (d) Nyihnyang indik pasikian “tetujon” miwah “panados”(penggabungan *tujuan dan akibat*), Akeh kaiwangan sane wenten ring widangan pasikian (*kesatuan*) inggih punika (12 lengkara). Keiwangan sane akeh ring widangan pasikian punika indik jejering miwah linging. Lengkara sane wenten ring sesuratan orti Radio Citra Bali akeh subyeknyane kasarengin partikel. Indik Dasar Pikayunan ring sesuratan orti puniki sampun becik lan sampun nganutin uger-uger lengkara efektif lan sampun nyihnyang indik pasikian. Ngelantur ring Nyihnaang pasikian “awinan’ miwah “galah” punika nenten wenten kaiwangan santukan sampun nganutin uger-uger lengkara efektif. Nanging ring uger-uger sane Nyihnyang indik pasikian “tetujon” miwah “panados”(penggabungan *tujuan dan akibat*) wenten kalih kaiwangan. Lengkara sane iwang punika wantah nyihnaang panados. Mangda sida lengkara prasida kabaos jangkep. Parindkan tetujon punika mangda

kasarengin antuk panados. Sepatutnyane pahan lengkara tetujon selanturnyane kasarengin lengkara panados. Tatujuan lan panados nenten dados kapalasang santukan punika mapaiketan. Kruna – kruna sane tiosan sampun manut sakadi uger-uger lengkara efektif.

Wewidangan irit (*kehematan*) wenten 3 pahan lengkara efektif sane katureksain inggih punika (a) Ngewawanin Jejering Lengkara (*mengulang subjek kalimat*) (b) Ngelidang Hiponim (*menghindari hiponim*), lan (c) Penganggen kruna Pangarep “saking” miwah “saihang”(penggabungan kata depan “dari” dan “daripada”). Akeh keiwangan sane wenten ring uger-uger irit(*kehematan*) inggih punika (46 lengkara), uger sane kapertama Ngewawanin Jejering Lengkara. Ring uger Ngewawanin jejering lengkara wenten 45 lengkara sane nenten manut sareng uger irit (*kehematan*). Samian kaiwangannyane pastika ngeninin indik partikel “-nyane”. Partikel “nyane” malih nyihnyang jejering lengkara. Punika sane nenten kapatutang. Sepatutnyane, yening lengkara sampun madaging jejering, nenten dados malih ngewawanin jejering lengkara antuk paertikel “nyane”, punika mawinan lengkarane nenten efektif yening rumasuk ring uger irit (*kehematan*). Ring Radio Citra Bali akeh orti sane nganggen partikel “nyane” lan sering kaanggen santukan rikala nganggen partikel punika rikala ngewacen tegep(tegas) kerasaang olih penyiar. Ngelidang Hiponim (*menghindari hiponim*) ring sesuratan Orti ring Radio Citra Bali FM, keiwanganne nenten kacumpuin

utawi lengkara erti punika sampun nganutin uger-uger lengkara efektif. Ngelantur ring Penganggen kruna Pangarep “saking” miwah “saihang”(penggabungan kata depan “dari” dan “daripada”) wenten kaiwangan wantah siki lengkara ring widangan kruna “saking”. Manut uger-uger lengkara efektif kruna “saking” nyihnyang indik wit (asal), nanging ring sesuratan erti sane Wenten ring Radio Citra Bali FM, kruna “saking” nenten nyihnaang wit (asal), punika sane nenten kapatutang. Sane ngawinang kruna “saking” sering kepatehang sareng kruna “manut”. Kruna “saking” sampun tatas nyihnaang wit (asal) lianan sareng punika kruna “saking” pinaka kruna partikel. Sepatutnyane subyek lengkara nenten dados kasarengin partikel “saking”. Punika sane kapatutang sajeroning nganutin uger-uger lengkara sane manut ( efektif). Wewidangan *penekanan* wenten kalih pahan lengkara efektif sane katureksain. Widangan lengkara efektif nyane inggih punika (a) Ngeserang genah frase (menggeser tempat frase) lan (b) Ngwawanin kruna-kruna sane pateh ( mengulang kata yang sama). Ring widangan ngeserang genah frase wenten ( 9 lengkara) sane iwang. Punika indik genah lengkara sane becik. Anggen ngicenin penekanan ring pahan sane nenten janten ring lengkara dados genah frase nyane kageser mangda lengkara punika kawacenan anut. Ring erti sane wenten ring Radio Citra Bali FM, wenten lengkara sane durung becik penekanannyane rikala kawacenan, sakadi lengkara sane sepatutnyane kagenahang ring arep kruna nanging ring erti kagenahang ring duri lengkara

sane ngawinang penekanannyane kirang. Sepatutne lengkara sane nyihnaang unteng sane kautamaang sumangdene kagenahang ring ajeng lengkara. Punika mawinan patut kawentenang uger ngeserang genah frase mangda lengkara prasida efektif. Ring uger Ngwawanin kruna-kruna sane pateh ( *mengulang kata yang sama*) kapanggih (79 lengkara) sane nenten nganutin uger-uger lengkara efektif. Akehan kruna sane mateges siki malih kasurat ring sikian lengkara. Punika sane nenten kapatutang. Sane ngawinang kruna-kruna sane pateh malih kawawanin santukan matetujon ngicen panegepan(*penegasan*) ring pahan lengkara sane karasa mautama (Putrayasa, 2010:57). Sepatutnyane lengkara sane pateh nenten kawawanin malih mangda lengkara punika efektif lan manut uger-uger. Wewidangan variasi wenten 4 pahan lengkara efektif sane katureksain, inggih punika (a) Kagancangan ring Pamungkah Lengkara (variasi di awal kalimat) (b) Kagancangan ring Pola Lengkara (c) Kagancangan ring Soroh Lengkara( variasi di jenis kalimat) (d) Kagancangan wangun lumaksana-linaksana( variasi bentuk aktif-pasif). Makasamian pahan lengkara efektif punika nenten wenten kaiwangan santukan sampun samian manut uger-uger utawi erti sane wenten ring Radio Citra Bali FM kawentenannyane sampun *bervariasi*. Manut makudang-kudang ceciren lengkara efektif sane kaanggen pustaka ring tetilikan puniki, kapanggih wantah 6 wewidangan sane wenten kaiwangannyane. Wewidangan



sane kabaosang inggih punika Jejering miwah Linging (Subjek dan Predikat), Nyihnayang indik Pasikian "tetujon" miwah "Panados"(tentang penggabungan "tujuan" dan "akibat"), Ngewawanin Jejering Lengkara (mengulang subjek kalimat), Pangarep "saking" miwah "saihang"(penggabungan kata depan "dari" dan "daripada"), Ngeserang genah frase (menggeser tempat frase), lan Ngwawanin krana-krana sane pateh (mengulang kata yang sama). Wewidangan lengkara sane kaanggen pustaka ring tetilikan inggih punika 13 pahan. Santukan pikolih ring tetilikan puniki sampun nganutin pemargi ceciren lengkara efektif, punika mawinan sesuratan orti ring Radio Citra Bali FM ring acara Teropong Buleleng anut sakadi sane kabaosang olih Putrayasa (2010 : 57) lengkara kawastanin efektif ening sampun nganutin kalih pamargi luir ipun wangun miwah ceciren lengkara efektif.

## **2. Pikobet – pikobet sane kapanggih olih penyiar teks orti acara Teropong Buleleng saeroning nyusun lengkara efektif**

Kapiambeng sane kapanggih penyiar teks orti ring acara Teropong Buleleng ring Radio Citra Bali FM kasaurin antuk kramaning saduwicara. Saduwicara puniki katujuang majeng penyiar sane nyiarang teks orti ring acara Teropong Buleleng. Penyiar sane nyiarang teks orti punika mawasta I Kade Angga Kukuh Setiawan. Panilik ngemargiang saduwicara majeng I Kade Angga Kukuh Setiawan manut pituduh manggala ring Radio Citra Bali FM. Saduwicara kalaksanaang ring rahina Buda, 20 Juni 2018 Malarapan antuk saduwicara puniki kaaptiang prasida nawis pikobet sane kapanggih olih

penyiar teks orti acara Teropong Buleleng ring Radio Citra Bali FM. Pikolih saduwicara sakadi ring sor puniki. Rikala orti punika rauh punika nganggen basa Indonesia, sane ngawinang kapilah dumun , katerjemahang nganggen basa bali ngelantur kawacen. Ring Radio puniki nerjemahang orti saking basa Indonesia ke basa bali kantung meweh pisan lan prasida ngawinang kosentrasi saking penyiar nenten becik. Sane ngawinang wenten penampen saking penyiar sane lianan mangda wenten penerjemah berita sane sampun wikan mabasa bali lan nganutin uger- uger sane kawentenang. Ngelantur Sane kaping kalih, kekirangan galah nerjemahang teks orti. rikala orti sampun rauh nganggen basa Indonesia katerjemahang kebasa bali, galah sane kasayagang akidik nanging teks orti sane katerjemahang dawé. Sane ngawinang lengkarane nenten efektif

## **Implikasi**

Sajeroning ngamargiang tetilikan puniki wenten tetilikan sane mapaiketan pinaka panyanding. Tetilikan punika kaanggen sasuluh rikala panilik ngamargiang tetilikan puniki mangda wenten sane kaanggen dasar utawi tetimbang.

1. Tetilikan saking Ni Putu Lita Sari(2015) sane murdanyane Nureksain Lengkara Efektif Ring Sesuratan Orti Bali TV Mapaiketan Pemilu April 2014. Ring tetilikan puniki objek sane katilikin pateh inggih punika ngeninin indik lengkara efektif, nanging sane minayang punika genah sane katilikin, ring tetilikan asoroh puniki kaambil ring Bali TV lan tetilikan sane kaambil mangkin genahnyane ring Radio Citra Bali FM.
2. Tetilikan saking I Gusti Agung Ayu Weli Suprianti sane

mamura Nureksain Anggah-Ungguhing Basa Bali Sajeroning Acara Mabasa Bali ring Radio Citra Bali 98,7 FM Singaraja. Ring tetilikan puniki genahnyane nilikin pateh sareng sane katilikin mangkin punika ring Radio Citra Bali FM, nanging sane minayang punika objek sane pacang katilikin inggih punika ring tetilikan asoroh sane sampun kabaosang punika nilikin indik Anggah-ungguhing basa bali lan ring tetilikan sane mangkin kemargiang punika nilikin indik lengkara efektif.

Pikenoh tetilikan puniki kaaptiang mangdane benjang pungkur prasida ngeranjingang lengkara efektif ring acara teropong Buleleng ring Radio Citra Bali FM. Kaiwangan sane kapanggih ring tetilikan puniki akidik. parindikan puniki sampun becik, nanging durung paripurna. Dumadak benjang pungkur prasida pinih becik lan nenten wenten kaiwangan malih sane kapanggih rikala makarya teks orti acara Teropong Buleleng ring Radio Citra Bali FM.

## PAMUPUT

### Tetingkesan

Manut parakan pikolihan miwah tetepasan tetilik indik lengkara efektif ring Teks Orti Acara Teropong Buleleng ring Radio Citra Bali FM, kapanggih tetingsesan sakadi ring sor puniki.

1. Lengkara sane prasida kapupulang salami 1 bulan akehnyane wenten 1371 lengkara ring teks orti Radio Citra Bali FM. Lengkara sane katureksain wenten 1225 (89,3%) lengkara sane efektif, lan 146 (10,7 %) lengkara sane nenten efektif. Lengkara efektif ring Teks Orti Acara Teropong Buleleng ring Radio Citra Bali FM wenten 6 wewidangan

kaiwangan. Wewidangannyane luir ipun jejerang miwah linging, nyihnayang pasikian “tetujon” miwah “panados”, ngewawanin jejerang lengkara, Pangarep “saking” miwah “saihang”(penggabungan kata depan “dari” dan “daripada”), ngeserang genah frase, miwah ngewawanin kruna-kruna sane pateh. Ring widangan jejerang miwah linging wenten 10 kaiwangan. Wewidangan nyihnaang pasikian “tetujon” miwah “panados” wenten 2 kaiwangan. Wewidangan ngewawanin jejerang lengkara wenten 45 kaiwangan. Widangan Pangarep “saking” miwah “saihang”(penggabungan kata depan “dari” dan “daripada”) wenten 1 kaiwangan. Wewidangan ngeserang genah frase wenten 9 kaiwangan lan ring wewidangan ngewawanin kruna – kruna sane pateh wenten 79 kaiwangan.

Tetingkesan ring sajeroning kramaning saduwicara sane kamargiang indik pialang rikalaning nyurat teks orti acara Teropong Buleleng ring Radio Citra Bali FM luir ipun.

- 1) Sane kapertama saking nerjemahang orti saking basa Indonesia ke basa Bali . Rikala orti punika rauh punika nganggen basa Indonesia, sane ngawinang kapilah dumun , katerjemahang nganggen basa bali ngelantur kawacen. Ring Radio puniki nerjemahang orti saking basa Indonesia ke basa bali kanton meweh pisan
- 2) Sane kaping kalih, kekirangan galah nerjemahang teks orti. rikala orti sampun rauh nganggen basa Indonesia katerjemahang kebasa bali, galah sane kasayagang akidik nanging

teks orti sane katerjemahang dawe. Sane ngawinang lengkarane nenten efektif.

#### Piteket

Piteket ring tetilikan puniki kaaturang majeng Radio Citra Bali FM utaminnyane Manggala Radio Citra Bali FM mangda nincapang malih gatra-gatra sane kasiarang. Punika taler indik tata titi lengkara efektif ring teks orti acara teropong buleleng ring Radio Citra Bali FM mangdane nganutin lengkara efektif. Piteket sane tiosan kaparakang sakadi ring sor puniki.

- 1) Ngeninin indik pikolih lan tetepasan dokumentasi ring tetilikan puniki, kaaptiang mangdane benjang pungkur prasida ngeranjingang lengkara efektif ring acara teropong Buleleng ring Radio Citra Bali FM. Kaiwangan sane kapanggih ring tetilikan puniki akidik. parindikan puniki sampun becik, nanging durung paripurna. Dumadak benjang pungkur prasida pinih becik lan nenten wenten kaiwangan malih sane kapanggih rikala makarya teks orti.
- 2) Ngeninin indik pikolih lan tetepasan saduwicara kaaptiang majeng angga sane ngwacen teks orti ring Radio Citra Bali FM mangdane nelebin indik lengkara efektif. Yening sesuratan teks orti ring Radio Citra Bali FM sampun kakaryanang madasar antuk lengkara efektif, sinah bebaosan sane kaunggahang utawi kasiarang becik tur lengut kepireng. Punika taler sang sane miragi nenten meweh ngresepin gatra sane kasobyahang rikala sampun ngambara.

#### KEPUSTAKAAN

Litasari, Ni Putu. 2015. Nureksain Lengkarane Efektif Ring Sesuratan Orti Bali TV Mapaiketan Pemilu April 2014. Skripsi (tidak diterbitkan) 2015. Jurusan Pendidikan Bahasa Bali. FBS Undiksha.

Weli Supriyanti, I Gst Agung. 2015. Nureksain Anggah – Ungguhing Basa Bali Sajeroning Acara Mabasa Bali ring Radio Citra Bali 98,7 FM Singaraja. Skripsi (tidak diterbitkan) 2015. Jurusan Pendidikan Bahasa Bali. FBS Undiksha.

Supiartha, I Made 1996. Kamus *Indonesia – Bali*. Denpasar : Dinas Pengajaran Daerah Tingkat 1 Bali. Junaedi, Fajar. 2013. *Jurnalisme Penyiaran dan Reportase Televisi*. Jakarta: Kencana Predana Media Group.

Putrayasa, Ida Bagus. 2010. *Kalimat Efektif (Diksi, struktur dan logika)*. Bandung: PT. Refika Aditama.

Universitas Pendidikan Ganesha. 2009. *Pedoman Penulisan Skripsi dan Tugas Akhir*. Singaraja : Universitas Pendidikan Ganesha.

Wendra, I Wayan. 2012. *Buku Ajar Penulisan Karya Ilmiah*. Singaraja : Universitas Pendidikan Ganesha.